


**Ngu jo cjua xi chja**  
**xujun changá tsēhē Nina XIII**

Historias del Antiguo Testamento XIII  
2 Reyes 23:31 - 25, Daniel, Ezequiel, Lamentaciones,  
Abdías




en el mazateco de Chiquihuitlán de Juárez



**Ngu jo cjuá xi chja**  
**xujun changá tséhë Nina XIII**

Historias del Antiguo Testamento XIII  
2 Reyes 23:31 - 25, Daniel, Ezequiel, Lamentaciones,  
Abdías





Las ilustraciones son propiedad de la Fundación David C. Cook, usadas con permiso.

Primera edición  
Historias del Antiguo Testamento XIII  
en el mazateco de Chiquihuitlán de Juárez  
México, D. F. .6C  
Febrero de 1994

## **Historias del Antiguo Testamento XIII**

### **Nixtin xi casahmi gobiernu Joacaz, hane sehe casahmi gobiernu Joacim ngajan nangui Judá**

**(2 Reyes 23:31-24:7; 2 Crónicas 36:1-8; Jeremías 22:11-12; 25-26; 31; 36)**

Xi cafë cahme Josías xcun si cojo me xi matitjun tsëhë nangui Egipto ne, quihndi rë me xi hmí rë Joacaz camá me ngu xatsë xuta matitjun. Xcun jyan sa ni casahmi me gobiernu ta, tsëhë xi Necao, me xi matitjun tsëhë nangui Egipto jan ne, casahmi me ngu yë xi cuechjitje xuta Judá tsëhë me, hane quijicojo me Joacaz nangui rë me. Hane Necao jan ne, cavejña me Joacim cahndë rë Joacaz, hntse me. Cachja profeta Jeremías cjua rë Nina xi hatuxa cuyaaïn Joacaz nangui Judá ta cueya me ngajan Egipto. Hane camachihin cjua vë.

Sacuaha Joacim ne, cahndiin me cjua rë Nina hane jemu choho casahmi me. Hya ne, cachja Jeremías cojo xuta nangui Judá xi sá xi tsindeyaain me cjuatacun rë me, Nina ne, sua me cahndë xi cuinduva sindadu cjín rë Nabucodonosor xi tsicjëya me nandya Jerusalén. Jerusalén ne, nandya ximinchacun rë Nina. Vëhë xi hya

xi cahndë nahmi cojo ngujo sa profeta ndacha cjua xi cachja Jeremías tséhë nandya vë ne, camameje catsiquehen me me. Peru ngujo xuta changa xi siu ngajan ne, catsinguitsjen rë me xi ha tjin rë ngu cientu nu xi nima profeta Miqueas ne, hacuaha cjua vëhë ni cachja me, hane tsajin yo catsiquehen rë me ngatsë rë cjua xi cachja me. Ngajan xi catsichaya xuta xi tsiquehen me Jeremías.



Hane hya xi tjin rë jyan nu xi cavitexa Joacim ne, cuitjin cachja Jeremías cojo yëjë xuta jan:

—Ngayun xuta nangui Judá ne, nuhyun cjua naha. Ha tjin rē can jyan nu xi tichjá cojo nuju cjua xi cachja Nina, peru nuhyun camaha ni. Chja Nina ta sá xi nindeyun cjuatacun nuju hane quihndē nihñuu xcusun chojyihí vë, sua me cahndē xi cuinechuncahdun nguehe nangui xi casua me xutachanga nuju. Peru miji nuhyun hane tivangunndujun sa chjuhuncun nina ndacha. Ngatsē rē vëhē ne, Nina ne, sua me cahndē xi Nabucodonosor, me xi matitjun tsēhē nangui Babilonia ne, cuaja xicjin me cojo nuju hane scaa rē me. Hane tsēhē xi cuatjin ne, cjue me cojo nuju hane cuinechun jyanchan tē nu ngu nangui xin. Hane hacuanitjin ni cuma cojo nangui xi siutahandee rē nangui Judá. Peru xi cavatju jyanchan tē nu jan ne, sahmi Nina castigu xuta caldeo jan, hane sahmi me xi nangui rē me ne, machjiriin xi cuma tsēhē xuta.

Ngu nixtin nga cachja Jeremías cuitjin:

—Cuitjin chja Nina cojo xuta nangui Judá: “Cjuehe ngu nixtin xi sahme ngu compromisu xatsē cojo nuju. Compromisu vëhē ne, tanguiin cojo compromisu xi casahme cojo xutachanga nuju hya xi cavaxëtje me tsēhē nangui Egipto. Compromisu vë ne, camajin

casahmi chihin me. Quihndë ne, compromisu xatsë ne, hacuiin xcun xujun tsihindu ta cueyá ley naha cahntsua cjuatacun nuju. Hane ngahan cumá ngahan Nina nuju, hane ngayun ne, xuta naha cumá ngayun. Hacuaha jyê nuju cojo cjuatsehen xi nihñu ne, ha quihndë tsajin nixtin xi tsinguítsjen.

Hya ne, tsajin cahndë xi cuisehen Jeremías yungun ngajan Jerusalén. Ngajan xi cajindaya me ngu cha chjinexujun xi hmí rë Barac xi catsihindu me yějë xi cachja Nina cojo Jeremías. Sehe quijicojo Barac yungun xi cuichja me cjua vë cojo xuta. Nina ne, meje sua nga me cahndë xi tsindeya xuta cjuatacun rë me cojo sa xi satiin rë me cjuañihi. Hane xi camá ne, hacuaha cahndë Joacim cjua jan, hane camacjan rë me. Cafaha me xtë xujun jan sehe cavincha me ndacahi rë me cavaca me. Sehe cachja Nina cojo Jeremías xi tsihindu nga me cjua vë ngu ndiya. Hacuaha cachja Nina xi hya xi cueya Joacim ne, sacuiin cahndë xi yojo rë me seyaniji.

Nixtin xi tjun cavetsihin cavitexa Joacim ne, cavechjitje me tsëhë Neco, me xi matitjun tsëhë nangui Egipto. Hane cojo sa xi cumatangun tujún jyë vëhë ne, casahmi me ngu jyë xuta xi jercu jyë



tujún cavechjitje me. Hya xi camá ne, Nabucodonosor, me xi matitjun tséhë xuta caldeo ne, cacaá rë me si cojo xuta nangui Egipto. Hane ngajan cavindeya ta Joacim ne, cavechjitje me tujúnsa Nabucodonosor. Peru xi cama jyan nu ne, cachja me xi miji cuechjitje sa me. Ngajan xi cafehe chuva ngu chuva ngu sindadu cjín rë ñuju nangui, hane casahmi me si hacuaha catsichëjë me mé xi meje rë me tséhë xuta nangui Judá. Hane ngascan ne, cafehe Nabucodonosor cojo sindadu cjin rë me. Hane cavaja xicjin me cojo xuta nangui Judá sehe cafaha me Joacim, camá me presu. Sehe quijicojo me cjín xuta nangui Judá ngajan Babilonia. Hacuaha quijicojo me tiji cojo tyucu rë oro xi tacuxa rë yungun rë Nina hane casahmi me xa cojo cahntsua ndihya rcun rë me ngajan Babilonia. Hane hya xi cahme Joacim ne, quihndi rë me xi hmí rë Joaquín ne, camá xuta matitjun tséhë nangui Judá.



**Xuta nangui Judá xi quijicojo xuta caldeo  
ngajan Babilonia**

**(Daniel 1-3)**

Hya xi cafaha Nabucodonosor Joacim xi camá me presu ne, hya quijicojo me cjín xuta nangui Judá ngajan Babilonia. Hane ngajñi rē xuta xi quijicojo me ne, hinchajñi ñuju cha nixti xi cuitjin hmí rē: cha Daniel, cha Sadrac, cha Mesac, hane cha Abed-nego. Sacuaha xcusun rē xuta caldeo jan ne, hacuiin mosu hndixahan cumá xuta xi cjuecojo me presu, ta cjuahaxin me yo xi tsejen xi jemu quicun cacun me hane sua me xa xi cuma rē me. Hane ñuju cha nixtin jan



ne, tivêhêchjine me cha xi cumá cha xutaxa rê ngajñi rê me xi vitexa xuta caldeo. Jemu ndaja cjuatacun casua Nina cha, hane sacuaha Daniel ne, hacuaha casua Nina cahndê xi cuma cuichja me mé vijne cjua rê chini. Nabucodonosor ne, jercu cachuya rê me tsêhê cha nixtin jan tsêhê xi jercu vechutaha cha cjuatacun. Hane casahmitangun me cha cojo xuta xi chutaha cjuatacun cojo sa xi tsinguixi rê me.

Ngu nixten ne, camá rē Nabucodonosor ngu chini. Hya xi camanchujun ni cafehya me xuta jan xi tsinguixi me mé vijne cjuarē chini jan. Hane cachja me vē xi sá xi cuichja me xi matitjun cojo me cjuarē chini ne, sehe cuma cuichja me mé vijne, peru sá xi tsajin ne, cumajin cuichja me. Ngajan xi jemu camacjan rē Nabucodonosor, hane cachja me xi cueya ngayējē ni xuta xi tjin rē me xa xi sua me cjuatacun. Cuatjin xi quiji sindadu rē me xi cjuaha me yējē xuta vē. Hane xi cafehe sindadu jan hiscan siu Daniel cojo jyan amigu rē me ne, cavinenguise Daniel capitán rē sindadu jan mé tsēhē xi cuatjin casua me xi matitjun cjuarē me xi cuatjin cumá. Sehe casua capitán camachaya rē Daniel tsēhē cjuacjintacun vē. Sehe quiji Daniel cafehya me me xi matitjun xi sua me hitsē cahndē



cojo sa xi sacuse rē Daniel cjuaquixi rē. Hane joho cachja me. Hya xi camá ne cavuya Daniel casua me camachaya rē xicjin me tsēhē cjuacjintacun vē. Sehe casahmi me oración rē me. Hya xi camá ne, Nina ne, cachja me cojo Daniel cjuarē chini hacuaha cachja me cojo me mé xi

vijne cjua rë. Sehe quiji Daniel cachja me cojo capitán jan xi quihndë tsiquiin me cha xi yahnga ta cjuecojo me Daniel ndihya rcun xi cuichja me cojo me xi matitjun. Hane hya xi cavisehen Daniel ndihya rcun vë ne, sehe cuitjin cachja me cojo Nabucodonosor:

—Sua cumachaya nuju xi tsajin hisca ngu xihin, handasa xi jercu tu cuechu camahani cjuatacun rë me, xi cuma cuichja me cojo nuju cjua rë chini vi. Peru tacun ngu Nina xi Nina cjuaquixi, hane me vëhë ne, meje tsingacun me ngayun mé xi cuatju cumá. Cuitjin chja Nina: “Ngajñi nijña nuju ne, cahyun ngu xcusun xuta xi jercu hnga. Rcu ne, tsëhë oro camá. Tyja rë ne, cojo ndanisin rë ne, tsëhë quicha tyava camá. Cahntsua rë ne, tsëhë quicha bronce camá. Hane ntsacu ne, casecjan nihndë cojo quicha. Hya xi tichutsujun ne, cahyu ngu ndyojo xi tsejen xi cati suva rë tsëhë ngu naxi. Hane ndyojo jan ne, cjanengui, hane casatë ntsacu xi cuajyihí jan, hane café cavetsun jingujyë ni. Hane tjo ne, quijicojo xtë rë. Hya xi camá ne, ndyojo jan ne, camajyë hisca cama ngu naxi xi catsë rë ngasunhdë. Vëhë cachutsujun hane cuitjin vijne: Ngayun ne, má yun sacuaha rcu rë oro vë ta jemu tjin nuju ngahñu hane jercu hñu



cjua nuju. Peru cahntsua xi chuva nu ne, cumatsejen ngu gobiernu xi cuitexa xi majo xi hacuiin hñu hñu cjua. Cumachjirëhë me sacuaaha quicha tyava. Hane hya xi cuitexaain me vëhë ne, cuma tsejen ngu gobiernu xi majyan, xi machjirëhë sacuaaha tsëhë quicha broncc. Hane xi mañuju ne, cuma ngu xi machjirëhë sacuaaha tsëhë quicha tujyë ni. Hane xi mañuju vëhë ne, hacuaaha tjin rë ngahñu

sacuaha tsëhë quicha. Hane xi mahñu ne, vëhë sacuaha ntsacu xi secjan quicha cojo nihndë ne, vëhë tsingacun xi gobiernu jan ne, xticjan rë hane cumá jo cahndë. Hane ngu cahndë rë ne, hñu cjua rë, hane cahndë xi majo ne, ndaya cjua rë. Nixtin hya ne, sahmi Nina xi cumá rë ngu gobiernu xi cuetsun rë gobiernu xi yahnga sacuaha cavetsun ndyojo jan xcusun xi cahyun. Hane gobiernu vëhë ne, tsajin nixtin tsajin nu cuetsun.

Hya xi cavatju sa nixtin ne, cavitexa Nabucodonosor xi catsindaja xuta ngu xcusun nina xi tsejen sacuaha jyihi ngu xihin hane suva oro camá. Hacuaha jercu tu hnga camahani xcusun vë. Sehe cavitexa me xi cjuane quicha tyjo hane hora xi cjuane ne, yëjë ni xuta ne, cuixcuhnchi me hane cjuaharcun me xcusun vë. Hacuaha cachja me xi cuma castigu rë xuta xi vihndiin tsëhë me. Cachja me xi sá xi tjin yo me xi sahmi me cuatjin ne, tsingatjeya me cahntsua ngu horno xi jercu suë. Hora xi cafane quicha ne, siu Sadrac, Mesac cojo Abed-nego, hane cavixcuhnchiin me hacuaha cafaharcuiin me xcusun jan. Hane xuta xi yahnga ne, quiji cavinchajyë me me. Hya xi cafehe me xcun me xi matitjun jan ne, cachja me xi cumajin sahmi me sacuaha meje rë me handasa sua sa

me ngu cahndē xi sahmi me. Cuitjin cachja me cojo  
Nabucodonosor:

—Sá xi ningatjun niji cahntsua hornu jan ne, tsajin rqui rē.  
Nina xi chjihinrcuin ne, cuma cuisecoo niji me xi tsajin mé cuma  
niji. Peru handasa xi cuaxintjiin me ngayin hane sua me cahndē xi  
cueyin ne, chjihinrcuiin xcusun xi tsujun.





Hya xi cuatjin cachja me ne, jercu tu cjan camahani camá rē Nabucodonosor. Catsingatju me xuta xi sahmi me xa rē me xi tsihasu sa rē me hornu, sehe tsihñu me catsijyan xihin israelita vē, sehe scandiya me me cahntsua hornu. Hane cuatjin casahmi me, peru me xi candiya rē me ne, cafaha me suē rē hornu hane cahme me. Hya xi camá ne, cavutsejen Nabucodonosor cahntsua hornu hane ngajan cavēē me ñuju xihin xi tsujyihya ndaya me ngajan. Hane mé xi mañuju ne, tu jyihí ngu Nina jyihí. Sehe camatiña Nabucodonosor tingotjo hornu jan hane cajindaya me xuta vē xi cuetju me. Hane cavetju jyan me vē. Peru hisca hitsē catiin me hacuaha hisca jnii nihndi tsjian rē me. Ngajan xi quijircun rē Nabucodonosor tsēhē me hane casahmi me ngu ley xi sa xi tjin yo xi choho cuichja tsēhē Nina xi faharcun jyan me vēhē ne, cumá me castigu.

### **Joaquín ne, vitexa me nangui Judá**

(2 Reyes 24:8-17; 2 Crónicas 36:9-10; Jeremías 22:24-30; 29:1-14)

Joaquín quihndi rē nima xuta matitjun xi hmi rē Joacim ne, casahmi me gobiernu nangui Judá xcun jyan sa ni. Tsēhē xi

cahndiin me cjuar rē ley rē Nina ne, Nina ne, catsingatju me profeta Jeremías xi cuichja me xi xuta ne, cjucojo me ngu nangui cjin hane ngajan cueya me. Sehe Nina ne, casua rē me cahndē Nabucodonosor xi cuiyujutahandee me sindadu cjin rē me nandya Jerusalén. Hane camajin casahmi Joaquín si, vĕhĕ xi quiijtjengui me Nabucodonosor hane camá me presu, sehe quiiji Nabucodonosor cojo rē me ngajan Babilonia sehe ngajan caseya me ndavaya. Hacuaha quiijicojo me xuta xi casahmi me xi matitjun Joaquín cojo yĕjĕ cha chjineya cojo cha chjinequicha cojo cha sindadu. Suva xi caviyuju me nangui Judá ne, xuta xi hitsĕ sa yuma. Hane casuaxa me Sedequías, hntsĕ nahmi rē Joaquín sacuaha me xi matitjun rē nangui Judá.

Nixtin vĕ ne, Jeremías ne, catsingatju me ngu xujun xi cafahtsja xuta nangui Judá xi quiijicojo Nabucodonosor nangui Babilonia. Cachja xujun xi cumangucacun ne ne, catisahmi me ndava me ngajan, catitsitjĕ me hacuaha cuma cuixan me ta tsĕhĕ xi cjin nu cuiyujucahndē me ngajan. Cachja me xi cuatju jyanchan tĕ nu, sehe sua Nina cahndē xi cuya me nangui rē me.

**Profeta Ezequiel ne, chja me cjuarã Nina cojo xuta  
tjã rã Judá xi siutaha me nangui Babilonia**

(Ezequiel 1-24)

Ngajñi rã xuta xi quijicojo sindadu Babilonia ne, quijicojo me ngu xihin xi hmí rã Ezequiel. Hya xi siutaha me ngajan ne, hasen rã Nina ne, cavisehentã cjuatacun rã me hane cavutsejen me hasen rã ngahñu cjuarã Nina hacuaha cachja Nina cojo rã me xi cuichja me cjuarã Nina cojo xuta tjã rã Judá. Cuitjin cachja Nina cojo rã me.

—Titsingátju ri xi cuinoje cojo xuta tjã rã Judá. Cuinoje peru xuta vã ne, jemu taja rcu me, hane cuihndiin me tsiji. Peru tsajin rqui rã ta meje rã xi cumachaya rã me xi sahme me castigu hane cuatju me cjuañihi ngatsã rã jyã rã me. Suva me cavangui me jyã rã me, ndastu, cuenda noje cojo rã me. Sá xi nuhyiin cjuarã naha, hane miji cuinoje cojo rã me ne, hacuaha tjin cun riji. Cuma cuinújan xi xuta ndaja ngaye, peru sa xi tiin cumachaya ri xuta xi miji rã xi choho sahmi me ne, hya xi choho sahmi me ne, tjin xi cun rã me peru hacuaha cojo ngaye tjin xi cun ri. Hane sã xi tihin cumachaya rã ngu xuta xi miji rã xi choho sahmi me ne, cuma xi tsindeya me

cjuatacun rē me, hane cuatjuhnga me tsēhē castigu, hane hacuaha ngaye ne, ndaja tsiji ta canihñi chihin cjua naha. —Cuatjin cachja Nina cojo Ezequiel.

Nina ne, cavitexa me Ezequiel xi cuichja me cjua vihi cojo xuta tjē rē Judá:

—Sua Nina cahndē xi sindadu cjín rē xuta caldeo ne, tsinguetsun me nandya Jerusalén hacuaha jercu cjín xuta tjē naja ne, cueya me. Yahnga me ne, cueya me ta cuma jindya rē me, hane yahnga me cueya me cojo chíhin. Hane yahnga me ne, cueyaain me peru cjue me presu ngu nanguixin. Cumá me castigu vē ta jemu taja rcu me; faharcun me nina ndacha. Hisca faharcun me nina ndacha cahntsua yungun rē Nina cjuaquixi. Vēhē xi xuta xi siu cuaha cjuahñu hya xi cuijnetaha si ne, cjuehe me presu nguehe Babilonia. Hisca cojo Sedequías, me xi matitjun ngajan Jerusalén ne, cjuehecojo me presu handasa sahmi me ngahñu xi cuatjunhnga me. Peru scaain rē me cjuehen me nangui vi. Jemu chuva xuta xi siucuaha me hya xi cuijnetaha si jan. Jemu chuva me xi cuma

cuichja me mé camá ngajan hacuaha cuaxēndaja me Yahvé sacuaha Nina cjuaquixi.

Quijinduju cachja Ezequiel cjua rē Nina cuitjin:

—Sacuaha ndaja sahmi ngu xihin cojo chjuun rē me ne, cuanitjin ni, casahme cojo yějē xuta tjē rē Israel. Hya xi casacu ná xuta vē ne, jemu xa jyihi me hacuaha quixti me. Peru casuá rē me tsjian ndaja xi cavaja me. Peru hya xi ndajyihi me ne, cama xta me hane quijitjengui me nina ndacha xi cafaharcun me. Camá me sacuaha ngu chjuun xi meje rē na xihin xi hacuiin tsēhē na. Vēhē xi cuma rē me castigu.

'Hacuiin yějē ni me xi cuma castigu ta suva me xi choho casahmi me. Ngu xihin ne, cumajin rē me castigu tsēhē xi cun rē nahmi rē me o tsēhē xi cun rē quihndi rē me, ta jimangu me satē rē me castigu rē suva me. Hane yo xi tjin rē ngu xcusun tsehen ne, peru cuindeya me cjuatacun rē me, hane quihndē sahmi me xindajin ta sahmi me xi ndaja ne, tsinchátaha me. Hitsē sa ndama ná hya xi sahmi xuta xi ndaja xi cuma rē xi satē rē me castigu. Peru sá xi tjin ngu xuta xi ndaja xcusun rē me, hane tsindeya me cjuatacun rē me ta

sahmi me xindajin ne, satë rë me castigu ta sahme cuenda  
cjuandaja xi tjun casahmi me.

'Hacuiin ndicumahani cavetsihin xi cuihndiin me tsahan ta  
cavetsihin hya xi cavaxëtje xutachanga rë me tsëhë nangui Egipto.  
Xuta nangui Judá cojo xuta nangui Israel ne, má me sacuaha jo  
tichja. Cama cjuavixan cojo rë me handasa ha manga rë me cojo  
xihin xi hacjahi. Peru cahndë xi manga rë me cojo xihin ndaja rë me  
ne, cavanguise sa me xihin xi hacjahi. Xuta nangui Judá, o sá na  
ngascan ne, cavutsejen na hacutjin cavatju na tjun, ta xuta nangui  
Asiria xi quiijtjengui me ne, catsinguetsun me nangui rë me. Peru  
tsacuiin me ta hacuanitjin casahmi suva me. Vëhë xi suá cahndë xi  
xuta caldeo ne, tsinguetsun me nangui Judá.

Sehe cajnetaha cachja Ezequiel cojo cjua vi:

—Ha meje cuechu nixtin xi cuinduva nga Nabucodonosor cojo  
xuta naja, hane hya tjin nuju cjuaquixi ta quixi jain cjua naha.

**Nabucodonosor, me xi matitjun rē xuta caldeo ne,  
tsicjēya me nandya Jerusalén**

(2 Reyes 24:18-25:21; 2 Crónicas 36:11-20a; Jeremías 21; 24; 27:12-28:17; 32-35;  
37-39; Ezequiel 17:11-18)

Sedequías ne, me xi cama xuta matitjun rē nangui Judá ne, tsini rē Joaquín má me. Cavitexa me nangui vē tengu nu, hane cahndiin me cjuá xi cachja Nina. Nixtin hya ne, nangui Judá ne, cavechjitje me tujúnsa nangui Babilonia. Hya xi camá ne, cachja profeta Jeremías cojo Sedequías xi sahmi nguýě xi sahmicihin me cjuá rē compromisu xi camá cojo Nabucodonosor, me xi matitjun rē nangui Babilonia ta xuta nangui Judá xi cjuecojo sindadu rē me vēhē ne, handasa cjuecjin me ne, peru hacuiin cjin cjuañihi cumá rē me. Peru sacuaha xuta xi cuiyujucahndē me nangui Judá o sá xuta xi vanga me nangui Egipto ne, jemu cjin cjuañihi cumá rē me. Hacuaha cachja Jeremías cojo Sedequías xi sua Nina cahndē xi Nabucodonosor ne, cjuaha me Sedequías, hane cjuecojo me nangui Babilonia. Cueya xu me ngajan peru ndajyihí cjuaveya rē me.

Peru Sedequías ne, chuyaaín rē me cjuá rē Jeremías hacuaha tjin profeta ndacha xi cachja cojo me xi tsajin ngu nixtin xi choho cuatju

nandya Jerusalén ta nandya vëhë ne, tacuntsja Nina. Hacuaha cachja profeta ndacha jan xi tiji cojo tyucu oro xi tacunxa yungun xi quijicojo xuta condra rë me ne, cuya cahndë rë. Cuatjin cachja profeta ndacha. Peru Jeremías ne, hacjahi cjua cachja me ta quijinduju me cachja me xi sá xuta sá xcusun jan ne, cjucojo sindadu cjín jan. Camacjain rë Sedequías cjua ndacha, hane catsinguetsunya me cjua rë me cojo Nabucodonosor hane cafehya me cjuandaja cojo me xi matitjun rë Egipto.

Ngajan xi casua nga Nina cahndë xi Nabucodonosor caviyujundee rë me xondyojo rë nandya Jerusalén cojo sindadu cjín rë me cojo sa xi cumajin cjue xuta nguijña. Hane ngajan caviyujucahndë me ngu nu vasen. Jinguyëjë rë xi tijima vëhë ne, Jeremías ne, tichjataha me nandya Jerusalén, hane ngatsë rë vë ne, quiji me ndavaya. Hatuxa cachja me cjuaquixi xi cachja Nina cojo me xi matitjun hacuaha cojo xuta xi yahnga. Ngu ndiya catsingatju Sedequías xuta xi quijijaha me Jeremías, hane cavinenguise me mé ndatjin sahmi me. Cachja Jeremías xi hitsë sa ndaja xi vuxaha me tingotjo, hane fehya me





cjuandaja rē sindadu caldeo. Peru Sedequías ne, tsacjun me sahmi me cuatjin.

Sehe cavechu nixtin xi quihndē scaain rē xuta xi vojo rē me. Hya xi camá jñu ne, cavetjuhma Sedequías cojo xutaxa rē me tsēhē xondyojo rē nandya xi cuanga me tsēhē sindadu cjín jan. Peru cama cafaha rē me sindadu jan. Sehe cavaxē me tuxcun Sedequías, hane quiijicojo me nangui Babilonia. Cojo vēhē camá chihin cjuaxi cachja profeta Jeremías cojo profeta Ezequiel. Sehe cavisehen sindadu cjín jan nandya Jerusalén hane catsinguetsun me yējē ni.

Hacuaha cavaca me yējē ni, sá yungun,

sá ndihya rcu, sá ndihya ndaja.

Hacuaha catsinguetsun me xondyojo.

Hacuaha jercu cjín xuta catsiquehen me me, hane xuta xi siu cjuaha me cjuahñu

hya xi cajnetaha cjuacjintacun jan ne,

quiijicojo me me nangui Babilonia.

Suva xuta yuma cavejña me nangui

Judá.



**Ngu cjuva va xi chja tsëhë cjuacjintacun xi camá  
nandya Jerusalén**

(Lamentaciones 1-5)

Hatuxa jemu va jyihi nandya Jerusalén niji. Nixtin hatsëë ne, quitsë rë cojo xuta. Peru quihndë ne, ndastu yo siu. Hatsëë ne, ña fircun rë xuta nandya. Peru quihndë ne, hisca tsajin yo xi cjuahacuenda rë. Ndiya xi cjue nandya Jerusalén ne, jemu va jyihi. Tsajin yo xi tsujyihya xi cjue suhi xi má yungun niji. Matsijin xuta niji tivisiajmi me tingotjo xondyojo. Jindayatë nahmi. Hane na nixtin ne, choho ma rë na. Xuta condra rë xuta niji ne, vitexa rë me. Jemu tjin rë cjuava ta camá niji castigu ngatsë rë jyê niji. Camá ngayin mosu hndixahan rë xuta condra niji.

Xuta condra niji ne, catsichëjë me cjuanchina niji. Hane sacuaaha yungun rë Nina ne, handasa chja ley rë Nina xi tsajin rë me cahndë, peru caveni ta cavisehen me cahndë rcun rë yungun, cahndë ximinchacun. Xuta xi siucuaaha me nandya ne, jindayava me xi cuenguise me pan xi jinë me. Tsindeya me cjuanchina rë me xi sacu rë me ndastu hitsë comida.

Ngayun, Nina niĵi, niĵņu cjuandaja coĵo niĵi ta jemu yumi. Jemu maxti niĵi ta jercu hngatacuin hane tisaťe niĵi castigu ře xi cun niĵi. Ndatsen xondyoĵo niĵi ne, tsiquehen niĵi xuta coĵo quicha ře me; hane cahntsua xondyoĵo jan ne, cueyin. Xuta nangui condra niĵi ne, ndama ře me ta tivatĵin cĵuañihi xi catuhun. Niĵņu cjuandaja, Nai, xi xati cuechu nixtin xi canúĵun xi cumá ře me castigu ře me sacuaĵa camá castigu niĵi.

Jemu cĵin cĵuasava camá niĵi, ngayin xuta nangui Judá. Hisca cavisehen xutaxin yungun niĵi, hane catsinguetsun me yungun jan. Tsajin yo me xi sahmi suhi, hacuaĵa tsajin yo cĵuahajenda nixtin xi chjahajenda ře. Tsajin nahmi hacuaĵa tsajin me xi matitĵun niĵi. Cahndě ře xi nuĵya ře cĵuandya ře suhi ře Nina ngajan yungun ne, tu nuĵya ře cĵuandya ře si.

Ngayin xuta tĵe ře Israel xi nechin nangui Judá ne, jemu va niĵi. Hisca matsijin niĵi ta jercu cachjihndin. Tsajin cĵuetacun xi cuma niĵi ta me xi profeta má xu ne, cachja me cĵua ndacha, hane cachjaaintaha me tsěĵe xi cun niĵi, hane catsanguin nduju coĵo cĵuatsehen niĵi. Věĵe xi tsajin rqui ře ta cama niĵi castigu. Xuta

nangui condra niji ne, vejnucëë me xi scuëë me xi nandya ndajyih  
 niji ne, cavuya xtë. Yëjë cjuacjintacun vëhë ne, camá jain, peru  
 camá ngatsë rë xi cuatjin cavejñacacun Nina xi cumá.

Ngahan ne, xi ngu ladu ne, cafë yëjë tsahan xi ndaja. Suva  
 cjuava tjin ná ta cavindeya yëjë ni. Peru xi ngu ladu nga ne, tjin ná  
 cjuetacun. Nina ne, jemu jyë camahani cjuahmutacun xi tjin rë me.  
 Ticaa niji ngatsë rë cjuayumatacun rë me. Chuva nixtin chuva  
 nixtin tjin cjuayumatacun rë me xi cuma niji. Jemu quixi me cojo  
 cjua rë me. Nina ne, ngu hora ni tsismicacun me xuta rë me.  
 Ndicumaha ni ne, jemu chja castigu, peru sehe ni ne, cumatsejen  
 cjuayumatacun rë me. Vëhë xi nichuvin cjuatacun niji hane nihñi  
 cjuaquixi cojo yëjë xuta. Hya xi tjin xi cun niji ne, nindeyin xcusun  
 niji cojo sa xi cuinuhyin tsëhë Nina. Hane oración niji ne, nihñi cojo  
 yëjë ni xahasen niji.

Nina niji, chjayín nuju xi chjuhuncuendun rë cjuayuma niji.  
 Jercu tivatjin cjuañihi. Ngayun ne, nihñu gobiernu nuju yëjë nu yëjë  
 nixtin. Tuhun niji cjuandaja nuju cojo sa xi ngu ndiya xatsë ni  
 cuinechinndijin cojo nuju hane chjihinrcuin nga nuju.

**Profeta Abdías cojo profeta Ezequiel chja me cojo xuta  
nangui Edom cjuá xi catsingatju Nina tsěhě me**

**(Ezequiel 25; Abdías 1)**

Sacuaha hya xi catsinguetsun sindadu cjín rě Nabucodonosor nandya Jerusalén, hya xi sehe chuva nixtin xi cavatju vė, Nina ne, cachja me cjuá vihi tsěhě xuta nandya Edom. Cuitjin cachja me:

—Hacuiin ndaja vėě Nina xuta nandya Edom. Vėhě xi ngu nixtin ne, xuta tjě rě Israel ne, tsinguetsun me nandya Edom. Sua Nina cahndě xi cuatjin cumá ta xuta nandya Edom ne, cavisecoo me xuta caldeo hya xi catsinguetsun me nandya Jerusalén. Hane hya ne, jemu cjín xuta nangui Judá catsiquehen me. Hane sacuaha castigu xi cumá rě me ne, tsiquehen xuta nangui Judá me, hane sacuaha nangui Edom ne, cumachjiriin xi cumá rě xuta.

Sacuaha nixtin xi cachja Nina cojo Ezequiel ne, hacuaha catsingatju me profeta xi hmí rě Abdías xi cachja me cojo xuta nangui Edom. Cuitjin cachja Abdías cojo me:

—Ngayun xuta nangui Edom, jercu ndaja camá rē xahasen nuju hya xi camachaya nuju xi xuta caldeo ne, catsinguetsun me nandya Jerusalén hacuaha catsiquehen me xuta nandya vë. Ngutjen catsangun canichujun mé xi casacu nuju, hane xuta xi casacu nuju ndiya xi tivanga me tsëhë cjuacjintacun vë ne, canicuhun. Ndama nuju hya peru cuechu nixtin xi Nina ne, tsicuya nuju me cjuacjintacun xi catuhun rē xuta nangui Judá. Xuta vë ne, ngu ndiya xatsë ne, sacu rē me ngahñu cjua rē me, peru ngayun ne, cjue gobiernu nuju ta jercu xta ngayun.

## **Xuta xi siu cuaha me cjuahñu nangui Judá ne, cjue cuiyuju cahndë me nangui Egipto**

*(2 Reyes 25:22-26; Jeremías 40-44; Ezequiel 29-32)*

Hya xi cacaa rē Nabucodonosor cojo sindadu cjín rē me xcun si ngajan nangui Judá ne, casuaxa me Gedalías xi cuitexa me xuta xi siucuhaha me ngajan. Hane ngajñi rē xuta xi siu me ngajan ne, hacuaha tacun Jeremías ta hya xi camá me presu ne, capitán xi cafaha rē me ne, casua me cahndë xi cavuya me nandya Jerusalén. Gedalías ne, casahmi tangun me xuta yuma xi siu cuaha me ngajan

hane cachja me cojo me xi sá xi sahmi me sacuaaha cachja Nabucodonosor ne, tsajin mé cjuachan hane cuma cjuenduju me cojo cjuahñu rë me. Peru ngu me xi hmí rë Ismael ne, catsiquehen me Gedalías jan. Hya xi camá ne, jercu catsacjun xuta ta nima jan ne, tacunxa me ngatsë rë cjua rë Nabucodonosor. Hane ngatsë rë xi tsacjun xuta cjuacjan rë Nabucodonosor jan ne, xi má rë me ne, hitsë sa ndaja cuanga me nangui Egipto. Hya ne, tjin ngu capitán rë sindadu nangui Judá xi camatitjun me tsëhë xuta yuma vë.

Hya xi camá ne, xuta matitjun jan cachja me cojo Jeremías, hane cafehya me me xi cuinenguise me Nina mé ndatjin sahmi me. Cachja me xi meje sahmi me mé xi cuichja Nina. Peru xi cjuaquixi ne, ha cavejñacacun me xi meje rë xi cjue me nangui Egipto. Hane meje rë me xi cjua rë Nina ne, sua ngahñu rë cjuatacun rë me. Hane cachja Jeremías cojo me cjua vihi:

—Chja Nina xi meje rë xi cuinechuntuhun nguehe nangui Judá cojo sa xi ndaja cuatjun cumá. Xicarcuun Nabucodonosor ta suaain Nina cahndë xi sahmi nuju me dañu. Caveni cuangun nangui Egipto. Xi má nuju ne, ngajan ndaxtu mé cuatjun cumá, peru

quixiin. Sá xi cuangun ngajan ne, tjin yo ngayun xi cueyun xi jemu jindya hane yahnga ngayun ne, cueyun xcun si. —Cuatjin cachja Jeremías.



Xuta matitjun jan ne, cachuyiin rë me cjua rë Jeremías. Quijicojo me xuta ngajan nangui Egipto sacuaha catsingatahacacun me xi cuma. Hane profeta Jeremías ne, hacuaha quijicojo me ngajan. Hya xi siu me ngajan ne, cachja Nina cojo Jeremías xi meje rë xi cuichja me cojo xuta jan xi ha meje cuechu nixtin xi cjuehe Nabucodonosor ngajan Egipto xi sahmi me si ngajan. Hane xuta nangui Judá xi siu me ngajan ne, cueya me hya ta tsëhë xi cafaharcun me nina ndacha.

Sacuaha tichja Jeremías cjua rë Nina cojo xuta nangui Judá xi quiji me nangui Egipto ne, hacuaha Ezequiel tichja me cojo xuta vëhë xi siu me nandya Babilonia, nandya rcun rë xuta caldeo. Cachja me cojo xuta jan xi xuta caldeo ne, ha meje cjue sahmi me si



cojo nangui Egipto, hane scaa rē me xcun si jan. Hacuaha cachja me cuitjin:

—Cachja Nina xi nandya rē Egipto ne, cuetsun hane cuma tiya. Sindadu cjín rē Nabucodonosor ne, jemu cjín xuta tsiquehen me ngajan. Cjuaha me sá tujún sá xcusun ndacun xi sacu rē me, hane cjuecojo me nangui Babilonia. Hane tsinguetsunya me yějē ndihya rē nandya vē. —Cuatjin cachja Ezequiel.

## **Cavuya cachja Ezequiel cojo xuta nangui Judá xi siutaha me nangui Babilonia**

(Ezequiel 33-34; 36-48)

Nina cachja me cojo Ezequiel xi cjuenduju cuichja me cjua rē Nina cojo xuta tjē rē Judá hya xi ha catsinguetsun sindadu caldeo nandya Jerusalén sacuaha cachja me hya xi chaja sa cumá vē. Hane hya xi camá cjuacjintacun vĕhĕ ne, cafehe sa xuta tjē vē, hane casua cuenda me xicjin mé xi cavatju me cojo mé xi cavatju nandya Jerusalén xcun si. Hya xi camá ne, casua Nina Ezequiel cjua xi

meje rē xi cuichja me cojo xuta nangui rē me. Cuitjin cachja cjua jan:

—Ngayun xuta tjē rē Judá, jemu cjín xcusun cjuatsehen canihñu. Xi má nuju ne, tsajin mé cuma nuju ta tjin cjuaquixi xi cuinechuntuhun nangui nuju ngatsē rē cjua xi cachja Nina cojo nima xutachanga nuju Abraham. Cachja Nina xi xuta tjē rē Abraham ne, satē rē me nangui vē. ¿Há satē rē nangui vē xuta xi faharcun me nina ndacha? Jeya, satiin rē me nangui vē. Tsajin yo xi satē rē nangui vē. Tsajin xti yo siu ngajan ta jemu choho canihñu. Cumachaya nuju xi Nina ne, Nai má me.

Sehe cachja Nina cojo Ezequiel xi handasa cjuehe xuta cuinenguise me cjua rē Nina ne, cuenda nduva me ta visiñuju me peru sahmii chihin me cjua jan. Cachja Nina xi xuta jan ne, cuenda nduva tsinguejñu sacuaha tsinguejñu me ngu me xi ndaja sē me.

Sehe cachja Nina cjua xi cuma tsēhē xuta matitjun rē xuta nangui Judá. Cuitjin cachja me:

—Cuitjin chja Nina: “Ngayun xuta matitjun ne, scaan ná cojo nuju. Hacuiin ndaja cuitexun. Cahndē xi cuitexun cojo sa xi ndaja cuatjun xuta naha ne, cuitexun cojo sa xi ndaja cuma tsujun. Ngayun ne, meje rē xi cumá nuju sacuaha ngu xuta ndaja xi ndaja cjuaha cuenda me chu tsánga rē me. Peru nihñu sacuaha ngu me xi choho sahmi cuenda me chu tsánga rē me. Naxun tsja ru xi cuma tsjian nuju, hacuaha chinu chu, peru tsujyihya suva chu, hane suva sacu rē chu xi sinē chu. Vēhē xi quihndē ne, cuitexuun sa. Ngahan Nina, cjuêjaha xuta naha tu nguehe tu ngahan hiscan siu me, hane cjuêcojo me xi cuiyuju nga me nangui Israel. Sahme cuidadu rē me hacuaha sahme xi cjue me ndiya xi ndaja. Sahme xi ngu xuta tjē rē David ne, cuitexa me me. Hya ne, ndaja tsēhē me yējē ni me ta cuisécoo rē me cojo cjuandaja naha. —Cuatjin cachja Nina.

Hacuaha cachja Ezequiel cjuá vi cojo xuta tjē rē Judá xi siutaha me nangui Babilonia. Cuitjin cachja me:

—Chja Nina xi sahmi me castigu xuta xi choho tisahmi me cojo nuju. Tsicuya me yun nangui nuju, hane ndaja cumá tsujun.

Hacuaha cuitjin cachja Nina cojo Ezequiel:

—Casahme castigu xuta tjë rë Israel ta cafaharcun me nina ndacha, hane vëhë xi jemu camacjan ná cojo rë me. Mameje rë xi cuma me castigu. Peru handasa camá me castigu hane quiji me nangui cjin ne, hisca ngajan ne, hacuaha cafaharcun me nina ndacha. Peru handasa cuatjin ne, tsiqueen me yëjë ni me. Cjuê nga cojo me nangui Israel. Hacuini tsëhë xi xindaja xi casahmi me xi cjuê cojo me, ta casahmi me xindaja. Tu cjuê nga cojo me ta cuatjin xcusun naha, hane cuatjin nuhya rë xuta xi Nina ngahan. Sehe tsinchátaha xuta tjë rë Israel yëjë cjuatsehen xi casahmi me. Jercu taja rcun me sacuaha taja ngu ndyojo. Vëhë xi cuaxë xi taja hane suá rë me Hasen naha cojo sa cuihdë me. Hane xi cuatjin ne, ndaja cuma nangui rë me. Vëhë xi nújun cjuá vi cojo xuta tjë rë Israel.

—Cuatjin cachja Nina cojo Ezequiel.

Hane cachja Ezequiel sacuaha cachja Nina.

Ngu nixtin nga ne, camá rë Ezequiel ngu chini. Ngajan cavëë me ngu ngasun xi jercu quitsë rë cojo suva ninda rë nima. Nina cachja me xi ninda jan ne, cuya nga xuta. Sehe cachja Nina cojo Ezequiel mé cjuá xi meje rë xi cuichja me cojo sa xi cuya nga xuta.

Hya xi camá ne, cavetsihin camatangun ninda jan, casetahacoo xicjin, camá yojo, hacuaha casaxtë rë chuxin. Hane cjín nima camá, peru tsajin cjuahñu rë. Sehe cachja nga Nina mé sa cjua cuma meje rë. Hane cachja Ezequiel cjua vë. Sehe camá quicun nima jan, hane casecun quixi ngu xuta cjín. Sehe cachja Nina xi ninda vëhë ne, tangun sacuaha xuta tjë rë Israel. Hya xi siutaha me nangui cjín ne, má sacuaha xi suva ninda má me hane matsijin xi cumá me cjuahñu. Peru cuya me nangui rë me hane cuya me cjuahñu. Ngajan ndaja cumá rë me hane hasen rë Nina ne, cuisecoo me. Hacuaha hya cachja Nina xi sá nangui Judá o sá nangui Israel ne, hya ne, ngu ni nangui cumá. Hane ngu xuta tjë rë David ne, cuitexa me yëjë xuta vë.

Sehe cachja Nina xi nixtin hya ne, caa rë sindadu cjín rë xuta tjë rë Israel xcun si xi cuma cojo condra rë me. Cachja me tsëhë xuta ngu nangui xi hmí rë Gog xi cuinduva me tsëhë ladu taha ngatihin hane cjuaha me cojo xicjin me. Peru Nina ne, sahmi me castigu sindadu rë nangui vë, hane cueya me yëjë ni me ngajan nangui Israel.

Hya xi camá ne, hya xi tjin rē teñuju nu xi sindadu cjin rē xuta caldeo catsinguetsun me nandya Jerusalén ne, casahmi Nina xi cavutsejen Ezequiel sacuaha ngu nchini xi tsejen hacutjin cumatsejen nandya vē hya xi cuma xatsē. Cavutsejenndaja me yějē tsēhē yungun xatsē xi cuma, cavutsejen me sacuaha chuva rē cojo hacutjin xcusun rē hacutjin camá. Hacuaha cavutsejen me nahmi hya xi tijima xa ngajan hane cafahacuenda me xi tijima xa chichihin hacutjin cachja cjua rē ley rē Nina xi cuma. Hacuaha cavutsejen me xi xuta rē yějē tjē rē xuta nangui Israel ne, camatangun me sacuaha ngu nangui hane tjin ngu me xi matitjun xi vitexa rē me.

**Nabucodonosor, me xi matitjun rē xuta caldeo o sá  
nangui Babilonia ne, cama sca rē me**

**(2 Reyes 25:27-30; Daniel 4)**

Ngu nixten ne, camá rē Nabucodonosor ngu chini. Hane cachja chini xi camá ngu ya xi jercu jyihi. Hacuaha jercu machjirēhē hiscan cuangui chu nguijña hacuaha casua xi jinē chu. Sehe canuhya rē cjua rē ngahnga xi cachja xi xti rē ya jan. Hane suva ndetjun cuejña. Sehe cachja xi ngajñi rē chu nguijña cuejña me

hacuaha cuine rē me xuñu, hane cjuatacun rē chu cumá cjuatacun rē me. Cuatjin cachja chini cojo rē me. Hya xi camá ne, cajindaya me Daniel hane cachja Daniel cojo me mé vijne cjua vë. Cachja Daniel xi chini vëhë ne, nduva tsëhë Nina. Cumá xu xi yatu nu tsujyihya me cojo cjuatacun rē ngu chu burru. Cuejña me ndatsen xi cuma nguixun hane jinë me xca nguijña. Machjiriin me sacuaha me xi matitjun nixtin hya. Hane xi cuijnetaha nu vëhë ne, cumachaya rē me xi Nina sua jain me cahndë tsëhë tu yo ni me xi sacu me cahndë xi cuitexa me. Cuatjin vijne xu cjua rē chini vë.



Hane cuatjin jain camá. Ngu nixtin tsujyihya Nabucodonosor ngajan cahndë rcu rë me hane tifircun rë me yějë xi tsëhë me. Hacuaha tivaxëndaja me yojo rë me cojo ngahñucjua rë me ta cojo ngahñu xu rë me catsindaja xuta nandya Babilonia. Hane hora xi cuatjin tsingatahacacun me, casahmi Nina xi camá sca rë me sacuaaha castigu ta tsëhë xi jercu xta me. Hane cavejña me cojo cjuatacun rë chu burro xcun yatu nu. Hane xi cajnetaha yatu nu jan ne, cavuya cjuatacun rë me hane cavitexa nga me peru quihndë ne camachaya rë me xi cuitexa me ngatsë rë cjuandaja rë Nina hane Nina ne, jemu tjin rë me ngahñu hacuaha jemu quixi me cojo cjua rë me.





Hya xi cavatju sa nixtin ne, cahme Nabucodonosor hane quihndi rë me xi hmí rë Evil-merodac camá me ngu xatsë me xi matitjun. Me vëhë ne, catsismi me Joaquín, me xi matitjun rë nangui Judá tsëhë ndavaya hane casua me xa ngajan nangui rë xuta caldeo.

**Xuta medo cojo xuta persa cacaa rë me xcun si  
cojo xuta caldeo, hane cavitexa me xuta caldeo  
cojo cjín sa xuta**

(Daniel 5; 7-8)

Cavatju sa nu, hane ngu me xi hmí rë Belsasar camá me xuta matitjun rë nangui Babilonia. Hane xcun nixtin xi cavitexa me ne, casahmi Nina xi cachja chini cojo Daniel. Ngajñi rë chini tjun xi camá rë me ne, cafehetejen ñuju chu nguijña xi cavetju chu tsëhë ndachacun. Sehe ngajñi rë chini jan cavinenguise Daniel ngu ángel xi tacun mé vijne vë. Hane cachja ángel xi jimangu chu ne, cuma sacuaha ngu nangui hñu xi cuitexatë xicjin nangui. Hane sacuaha tsejen ngahñu rë chu ne, hacuaha cuatjin cumá ngahñu rë gobiernu rë me. Hane chu xi má nuju ne, hitsë sa tjin rë ngahñu xi cumá rë


chu xi yahnga jan. Chu xi má ñuju ne, tē ndyaja yaja rcu chu. Hane jima ngu ndyaja vē ne, cumá sacuahaha ngu me xi cuitexa. Jima ngu me cuitexa me ngu cahndē rē ngasunhndē. Hane vasentjin rē ndyaja vē ne, cavetju ngu xi lihndi. Hane jyan ndyaja xi ha siu ne, cafēya tsēhē xi lihndi vē ne, cuma ngu me xi cuitexa, hane scaa rē me xcun jyan me xi matitjun jan. Hane xi lihndi vē ne, tsitjungui me Nina, hane cjue tjengui me xuta xi macjain rē Nina cojo cjuañihi. Hane hya xi cuatjin cumá ne, cuma me castigu hane tsingatju Nina Quihndi rē Xuta Jain xi cuijne me ngajñi yufi sehe cuitexatē me jingujyē ni ngasunhndē yējē nu yējē nixtin.

Cavatju jo sa nu, hane camá nga rē Daniel ngu chini. Hya ne, cavutsejen me ngu chu tsánga xihin xi jo ndyaja rē chu. Hane sacuahaha ndyaja vē ne, hacuiin tangun cun ta ngu ni hitsē sa jyē xi cuma rē xicjin. Hacuaha hñu ngahñu ru, hane casahmi chu tu cun xi meje ru. Peru handasa tjín ru ngahñu ne, caféhe ngu chu tentsun, hane catsingatje chu chu tsánga jan. Chu tentsun jan ne, ngu ni ndyaja yaha chu vasentjin rcu ru. Hane catotoho ndyaja jan ngajñi rē si jan. Peru cahndē rē ngu vē ne, ñuju ndyaja cavetju. Hane tsēhē ngu ndyaja vē ne, cavetju ngu lihndi xi lihma. Hane xi lihndi vē ne,

cuma nga me xi tsitjungui me Nina, me xi cuaxëndaja yojo rë me, hane jercu meje cjue titjun me. Tsinguetsun me yungun rë Nina, hane suaain me cahndë xi sua xuta tujún ngajan. Peru cachja Nina xi sehe cumandaja nga yungun.

Hane ngajñi rë chini vë, Nina catsingatju me ángel xi hmí rë Gabriel cojo sa xi cuichja mé vijne chini. Hane cachja ángel xi chu tsánga jan ne, hacui xuta matitjun tsëhë nangui Media cojo tsëhë nangui Persia xi sehe cuitexatë me, hane chu tentsun hacui xuta nangui Grecia xi cuitexatë me ngaxtun vë. Cachja xi ndyaja tjun ru hacui me xi matitjun cuitexa rë. Hane hya xi camá ñuju ne, meje cuijne xi cahndë xi cavitexa ngu me vëhë ne, cuatëcja me, hane ñuju cahndë cumá, hane hacuaha cumá ñuju me xi cuitexa me nangui vë. Hane xi lihndi vëhë ne, cumá me xi matitjun xi jemu choho xcusun rë, hane jemu choho sahmi me cojo xuta xi macjain rë me Nina.

Hya xi camá ne, cavechu ngu nixten xi me xi matitjun xi hmí rë Belsasar casahmi me ngu suhi jyë. Hane cavitexa me mosu rë me xi cjuejaha cha tiji xi canduva nima Nabucodonosor cojo tsëhë yungun rë Nina ngajan nangui Judá. Hya xi tihvisuhi me cojo xicjin me



tsēhē tiji xi tacunxa yungun vē ne, ngajñi rē cjuasua rē me ne, tivaxēndaja me nina ndacha rē me. Ngajan xi tu ñahnú ni cafehetsejen ngu rcuntsan xi tsejen sacuaaha tsēhē tsja xuta, hane cavetsihin catsihindutaha xihndē cuarto hisca siu suhi me. Hya xi cavutsejen Belsasar cjuarcun vēhē ne, jercu catsacjun me camá. Sehe cajindaya me yējē xuta xi sua rē me cjuatacun xi cuinduva me cuichja me mé vijne cjua xi camahindu jan. Hya xi casacuiyiin rē mé yo xi cuma cuichja ne, na chjuun rē me ne, caveyanangui na Daniel.

Hya xi camá ne, cajindaya me Daniel. Hya xi cafehe Daniel ne, me xi matitjun jan ne, meje sua me yējē xcusun cjuanchina cojo ngu xa xi cumatitjun me sá xi cuma cuichja me mé vijne cjua vē. Peru cachja Daniel cojo me cuitjin:

—Ngahan ne, miji ná cjuatjo nuju. Cuichjá cojo nuju mé vijne cjua vē. Ha hyun ta Nabucodonosor, nima nahmi nuju, jemu tjin rē me ngahñu nixtin hatsēē. Hane hya ne, cama sca rē me. Yatu nu camá sca rē me, hane cajinē me xca nguijña sacuaaha jinē ngu chu burru. Hane xi cajnetaha nixtin vēhē ne, machaya ndaja rē me

ngahñu rē Nina. Ndaja hyun cjua vē peru cachjasun tsēhē ta canaxunndujun yojo nuju sacuaaha xi hitsē sa tjin nuju ngahñu xi cumá rē Nina. ¿Mé cjuahngatacun canihñu xi canihñuxun cojo tiji xi tacunxa rē Nina? Cahndē xi naxunndujun Nina xi cjuaquixi ne, naxunndujun nina ndacha nuju. Ngajan xi Nina xi cjuaquixi ne, catsingatju me rcuntsan jan xi tsihindu cjua vē ta hatuxa yējē xuta cojo yējē me xi matitjun ne, tacuntsja Nina. Cjua xi camahindu jan ne, cuitjin vijne: camaxqui, camaxqui, camachuva, cavatēcja. Xi camaxqui ne, meje cuichja xi camaxqui nixtin xi cuma cuitexun. Xi camachuva ne, meje cuichja xi catsichuva Nina xcusun nuju, hane chuyiin rē me tsēhē. Xi cavatēcja ne, meje cuichja xi cavatēcja Nina nangui xi cuitexun, hane cahndē rē xi ngu nangui cumá, cumá jo, hane ngu cahndē cuitexa xuta medo, hane ngu cahndē cuitexa xuta persa.

Hya xi camá nguixun ne, cavisehen sindadu cjín rē xuta medo cojo sindadu cjín rē xuta persa, hane catsiquehen me Belsasar. Hane ngu xuta medo xi hmí rē Darío cavitexa me cahndē vē.

## **Nina cavaxētje me Daniel hya xi caxincha me ngojo cojo chu xa cjan rē**

(Daniel 6)

Hya xi cavitexa Darío nangui cjin xi cacaa rē me xcun si ne, casahmi me ngu xcusun xi cavaxijin me presu xi tjin rē cjuatacun, hane casuaxa me xi cuma me xuta tjun. Hane Daniel ne, tjin rē me cjuatacun, hane cafaha me ngu xa vē. Hane ngatsē rē xi jemu ndaja casahmi me xa vēhē ne, cavetjuxihin Darío, hane xi má rē Darío ne, sua me ngu xa xi hitsē sa tjun. Hane cojo vēhē ne, cha xi yahnga xi sahmi cha xa vēhē ne, jemu cama chini cha. Ngajan xi ngajñi rē cjuachini rē cha jemu cafahacuenda cha mé xi sahmi Daniel, peru casacuiin rē cha mé tsēhē xi cuinchajyē cha me ta jemu ndaja me hacuaha jemu quixi me cojo cjua rē me. Peru cavutsejen cha xi Nina xi faharcun Daniel, hacuiin nina rē nangui vē. Hane catsingatahacacun cha xi sacuaha ngu xcusun xi sahmi Daniel hya xi faharcun me Nina rē me ne, cuma cuinchajyē cha me tsēhē. Hane cavutsejen me xi nchunchujun ni ne, sahmi Daniel oración rē me. Ngajan xi tjun quiji cachjahaxi cha cojo Darío, me xi matitjun hane cachja cha cuitjin:



—Ngayun Darío, nuhyun cjua xi tinújin. Camatangun cjuatacun niji hane xi má niji ne, ndaja tsejen sá xi naxun ngu ley xi cjuecani rë ngu sa. Hane cuichja ley vë xi ngayëjë ni xuta sahmi me tu mé ni oración xi sahmi me, peru sahmi me cojo nuju. Hane sá xi sahmi me cojo ngu xuta o sá cojo ngu nina ne, cumá me castigu cahntsua ngojo xi hincha chu xa cjan rë.

Hane sua camá rë xahasen rë Darío, hane catsihindu me ley vë. Hane xcusun xi tjin rë me ne, ngu ndiya xi camahindu ngu ley ne, sahmi ngu jyë xi sahmi chihin me ley.



Xcusun rē Daniel ne, jyan ndiya xi ngu nixtin ne, sahmi me oración rē me. Hane quijinduju me cojo xcusun vë handasa camachaya rē me ley xatsē vë. Hane xuta vë ne, cavutsejen me Daniel hya xi casahmi me oración rē me. Hane quiji cavinchajyë me xcun me xi matitjun. Jemu choho má rē Darío hya xi camachaya rē me cjuacjintacun vë. Tsajin rē me cjuasua xi sahmi me castigu Daniel peru sahmi ngu jyë xi sahmi me ta ley vitexa. Xcusun rē xuta vëhë ne, hacuiin ndavaya xi sahmi xa ta ngojo rē chu xa yehe candiya me xuta. Hane tsëhë xi suaain me xi jinë chu, hya xi scandiya me xuta ngajan ne, jinë chu xuta vë. Ngajan xi cavitexa Darío mosu rē me xi tsingatjeya me Daniel cahntsua ngojo hiscan hinchu chu vë. Hane hacuaha quiji me xi matitjun jan, hane cachja me cojo Daniel cuitjin:

—Cataxëtje nuju nina nuju ta ndaja chjuhuncun me.

Hya xi camá ne, catsingatjeya cha me cahntsua ngojo vë sehe casechja ngojo cojo ngu ndyojo jyë sehe casetaha sellu cojo sa xi tsajin yo nduva cuaxë rē Daniel. Sehe cavuya me ndava me. Peru sacuaha Darío ne, cafaain rē me nijña nixten hya.



Xi casahasen ne, cavanga Darío hisca ngojo vë, hane cajindaya me ñihi rë Daniel ta tsëhë xi meje jyëcacun me sa quicun cuaha Daniel. Hane Daniel ne, cuitjin cachja me:

—Chjuhun cjuetacun. Tejña cuaha. Nina xi faharcun ne, catsingatju me ángel rë me, hane ángel vëhë ne, cavechjahñu me hntsua chu cojo sá xi tsajin mé camá casahmi chu cojo ná ta tsajin xi cun ná.

Camangucacun Darío hya xi cahndë me cjua rë Daniel. Cavitexa me xuta rë me xi cuaxë quijircun rë me xi tsajin hiscan xi cajentsun chu yojo rë me. Hya xi camá ne, catsingatjeya me cha condra rë Daniel cahntsua ngojo vë. Hane hisca chaja sa xi cuijne cha nangui ne, chu xa vëhë ne, cafaha

chu cha xi sinë chu cha. Sehe cavaxë Darío ngu ley xi chja xi meje rë xi cjuaharcun xuta Nina xi faharcun Daniel.

**Nixtin xi cavitexa Darío cojo Ciro ne, cachja chini  
cojo Daniel ngu jo cjua xi catsingatju Nina**

**(Daniel 9-12)**

Cuitjin camá rë Daniel ngu nixtin hya xi nu tjun xi cavitexa xuta media xi hmi rë Darío. Hya ne, tivutaya Daniel cjua rë Nina. Hane hya ne, tsingatahacacun me tsëhë ngu cjua xi catsihindu profeta Jeremías hiscan xi chja xi cahntsua jyanchan të nu ne, nandya Jerusalén ne, machjiriin sacuaha ngu nandya hñu. Hane hya xi tsingatahacacun me ne, hacuaha cavejña me xun rë Nina hacuaha casahmi me oración rë me. Cafehya me cjuaninchataha rë Nina tsëhë jyë rë me hacuaha cafehya me ngatsë rë yëjë xuta tjë rë me. Hacuaha cafehya me cjuandaja rë Nina xi cuma rë nandya Jerusalén. Cachja me xi cjuañihi xi cavatju xuta tjë rë Israel ne, tjin chuva rë xi camá ta cahndiin me. Cachja me xi camá cjuañihi hacuanitjin sacuaha catsihindu nima Moisés xi cumá sa xi hndiin xuta cjua rë ley rë Nina. Cuatjin cachja Daniel xcun oración rë me.

Hya xi tichja me ne, cafehe ngu ángel xi hmi rē Gabriel ta cuichja cojo Daniel mé xi cjuayangui Nina tsēhē cjua jan. Cuitjin cachja Gabriel:

—Jyanchan tē ndiya xi yatu. Cuatjin cuechun xqui rē chan xi cjuecani rē ngasunhdē. Hya cumatsejen nixtin xi cuihdē xuta hane suva cjuandaja sahmi me. Hya ne, cumachihin yējē cjua xi cachja profeta rē Nina. Hacuaha hya ne, cahndē rcu rē Nina ne, suva xa rē Nina xi tacun. Sa xi cuetsihin cuma xqui nixtin hya xi ngu me xi matitjun cuitexa me xuta tjē rē Israel xi cuya cjue tsindaja xuta vē nandya Jerusalén, hane cjuehe xqui hiscan cjuehe Mesías, me xi cuitexa Nina xi cuinduva me, nixtin vēhē ha camá xi ha cavatjun ngu chan vēhē yatu ndiya cojo jyanchan jo sa ndiya. Hane xi cavatju jyanchan jo chan jan ne, cuetjuxin Mesías hacuaha cjuehe sindadu xi cuetsun nandya Jerusalén cojo yungun. Sacuaha yatu chan xi cuijnetaha nixtin vēhē ne, me xi vitexa me sindadu jan ne, sahmi me ngu compromisu. Hane vasentjin rē yatu chan xi cuijnetaha jan ne, suaain sa me cahndē xi tsiquehen xuta chu xi sua me Nina sacuaha cjuatjo. Sehe hya xi cuijnetaha nixtin jan ne, hya satē rē ngasunhdē yējē cjuañihi xi cachja Nina xi cuma hya xi

cuijnetaha ngasunhdë. —Cuatjin cachja ángel Gabriel cojo Daniel nixtin xi cavitexa Darío.

Sehe camá xi xuta persia cacaa rë me xcun ngu si hane Ciro, me xi matitjun rë me ne, cavitexa me. Hane hya xi cavitexa Ciro nangui vë ne, cachja nga chini cojo Daniel ngu jo cjua xi catsingatju Nina. Cjua xi cachja chini jan ne, jemu chja. Vëhë xi cafehya Daniel Nina xi cuisecoo me cojo cjuatacun jan. Hya xi camá ne, catsingatju Nina ngu ángel. Cuitjin cachja ángel jan:

—Ngayun Daniel, chjuhun cjuetacun ta Nina ne, jemu hmucacun me yun. Chjuhuncuendun cjua naha. Hya xi cuijnetaha cuitexa Ciro vi ne, ñuju sa me tsëhë tjë rë xuta persia cuitexa me. Me vëhë xi ma ñuju me ne, hitsë sa nchina cumá me tsëhë xicjin me, hacuaha hitsë sa cuma hñu cjua rë me xi cumá rë xicjin me. Peru jinguyëjë rë xi tivitexa me ne, cjuehe ngu sindadu griego xi scaa rë me cjuahaxin me ngahñu cjua rë me xi má ñuju jan, hane cuitexa me suva me. Sehe sindadu vëhë ne, cueya me hya xi sehe tsejen sacuaha xi tsajin sa yo xi condra rë me xi scaa rë me cojo me. Hane ngatsë rë xi tsajin quihndi rë me xi cuisehen xa jan ne, nangui xi

vitexa me ne, fiuju rqui cuma, hane jimangu rqui jan ne, hacjahi  
 hacjahi nga me xi cuitexa me ngu rqui jan. Me xi matitjun rë Siria  
 ne, cuitexa me ngu rqui ngatihin. Hane me xi matitjun rë Egipto ne,  
 cuitexa me ngu rqui canangui. Hane jo me xi cumatitjun jan ne,  
 condra rë me xicjin me. Titjun ne, me xi matitjun rë Egipto ne, hitsë  
 sa cjin cuma ngahñucjua rë me, sehe cuindeya hane me xi matitjun  
 rë Siria ne, hitsë sa cjin cuma ngahñucjua rë me. Hya xi tsejen xi  
 xuta nangui Siria cjue tjun me ne, cuetsihin cjue tjun ngu cha  
 tsiquehen, xi jemu ndacha, hane cuechu cha xi cuma cha me xi  
 matitjun. Sehe cjue cha ndacha jan cojo sindadu rë cha hane sahmi  
 cha si cojo sindadu nandya egipto, peru scaain rë me xcun si jan.  
 Hane cojo cjuasava vë ne, jemu cumaxti rë me hya xi cuya me  
 nangui rë me. Hane ndiya jan ne, cuechu me nangui Israel, hane  
 ngajan nangui vë ne, tsicjë me cjuaxti rë me. Ngajan xi tsingatju me  
 sindadu rë me nandya Jerusalén, hane suaain me cahndë xi cjue xuta  
 sua cjuatjo rë Nina. Hacuaha cuisehen sindadu jan yungun, hane  
 tsinguetsun me cahndë ximinchacun ta cuisehen xcusun tsehen xi  
 tsinguetsun. Jemu xuta tsehen me xi matitjun jan. Hya ne, yahnga  
 xuta tjë rë Israel ne, johu ni cuichja me cojo me xi matitjun jan.  
 Peru yahnga me ta faharcun me Nina ne, sahmi me si cojo me. Sehe

cuechu nixtin xi cueya me, hane sehe cjuehe ngu ángel xi hmi rē Miguel. Miguel ne, me vëhë xi sahmi me cuidadu xuta tjë rē Israel. Hacuaha cuechu nixtin xi cuya cjuahñu rē yëjë ni nima. Yahnga me ne, cuiyuju me cojo Nina yëjë nu, yëjë nixtin; peru yahnga me ne, cuma me castigu nixtin nixten. —Cuatjin cachja ángel.

**Catsihindu profeta Isaiás cjuá xi cjuahatsja xuta  
tjë rē Israel xi sacu rē me cahndë  
xi cuya me nangui rē xutachanga rē me  
(Isaiás 40-66)**

Cahntsua libru rē cjuá rē Nina xi catsihindu profeta Isaiás ne, tjin cjuatacun rē xuta xi casacu rē me cahndë xi cuetju me nandya Babilonia, nandya xi cuitexa nangui Caldeo, hane cuya me nangui Israel, nangui rē xutachanga rē me. Cuitjin catsihindu me:

—Nina catsingatju me ngahan xi suá cjuetacun rē xuta hacuaha xi cuichjá cojo me xi cuijnetaha nixtin rē castigu rē jyê rē me ta jemu cjín nixtin quijjicani rē. Chja ngu me xi chja me ngajan jemu xin tsëhë nandya. Cuitjin chja me: “Tuhunchjinu ndiya tsëhë Nai

naja; ninguixun ndiya tséhë me. Yějë ni ndetjún cojo yějë ni naxi ne, cumachihin. Yějë ni hiscan nangui cahntsua ne, tsêya rë. Yějë ni ndiya xi hacuiin chihin ne, cuma chihin hane naxindya ne, ngasun cumá. Hane yějë ni xuta ngasunhdë scuëë me hasen rë ngahñucjua rë Nina.”

Ngu cahndë nga catsihindu me cuitjin:

—Yějë ni xuta ne, sacuaha xca nguijña me, yějë ni xi ndaja tséhë me ne, sacuaha naxu rë xca nguijña má. Xca nguijña jan ne, xí, hane hacuaha xca rë naxu ne, vixu cojo tjo, hane ngajan cafë. Quixi xi sacuaha naxu sacuaha xca má xuta. Peru cjua rë Nina ne, cjuecani rë yějë nixtin yějë nixten. —Cuatjin catsihindu me.

Hacuaha cachja Isaías cojo xuta jan xi meje rë xi cuichja cojo xuta tjë rë Israel xi tacun jain Nina rë me. Tacun me ta cuitexa me hacuaha sua me sacuaha satë rë jima ngu me. Hacuaha ndaja sahmicuenda me sacuaha sahmicuenda ngu pastor chu tsánga rë me.

Nina ne, jemu tjin rë me cjuatacun hacuaha jercu hñu ngahñu cjua rë me. Tsajin yo cuechutaha rë cjuatacun rë



me. Peru sacuaaha Nina ndacha xi sahmi xuta ne, hya xi sehe tu camandaja ni, meje rë cuidadu cojo sa xi cuetsiin. Sahmi xuta nina vë tsëhë ya, peru vasen rë ya jan ne, cuma chaquin hane vasen rë ne, cuma nina. Jemu sihya vë, jemu cjuangarca. Hacuiin cuatjin má cojo Nina xi cjuaquixi. Nina ndacha vë ne, tsajin rë ngahñu xi finiya yojo rë. ¿Há tjin rë ngahñu xi cuisecoo xuta xi faharcu rë? Peru Nina quicun ne, tjin rë me ngahñu xi cuitexa me yëjë ngasunhndë cojo ngahnga. Tsajin yo cuechutaha rë ngahñu rë me. Caveni nújan xi matsijin rë Nina mé xi tijima naja ta Nina ne, fendaain rë me, quicun me yëjë hora. Cuinchaxta me xahasen naja sa xi mangutacun cojo me.

**Cuitjin chja Nina:**

—Yëjë xi tsëhë ngasunhndë ne, cuitéxa ngahan. Vëhë xi yëjë xuta ngasuhndë ne, meje rë xi faharcun ná me. Peru hitsë sa meje rë xi chjuhuncun ná ngayun xuta tjë rë Israel ta cavaxejen nuju. Cajindáyavaha nuju nangui nuju handasa jemu cjín nanguicjin cavinechuntuhun. Mosu ndaja tsahan, chjá tsujun. Vëhë xicarcuun

ta tejña cojo nuju hane cuisecoo nuju. Sahme xi choho cuma rë xuta xi choho sahmi me cojo nuju. Hacuiin cjín má yun ta chuva má yun peru tjin nuju cjuandaja naha.

Cuitjin chja Nina:

—Tsingátju ngu me xi mosu ndaja naha cumá, ngu me xi cavitéxa. Cavaxejen me hane jemu sua má ná ngatsë rë me. Suá rë me Hasen naha, tsichuva me xutaxin cojo cjuaquixi. Hacuiin hñu cuisiajmi me cojo xuta; hacuiin jindayatë me xi cuichja me hiscan cuiyuju xuta. Scotaain me cjuatacun rë hiscan ngu xuta yuma xi tangun me cojo ngu ndeje xi caxtane, hacuaha sahmi chuvaain me cjuatacun rë xuta yuma xi tangun me cojo ngu candil xi ha ndiya coho. Cuatjin sahmi me hisca cumatsejen cjuaquixi rë gobiernu rë me. Hisca xuta ngu nangui lihndi ne, cuetahacacun me me.

Yahvé ne, me vëhë xi Nina Jain me. Vëhë xi sa xi faharcun xuta nina ndacha ne, hatuxa sahmi Nina Jain xi cuma xuta jan castigu, ta tsajin sa nina, ngu tutu Nina Jain xi nina me. Cuitjin chja Nina cojo nuju: “Ngayun xuta tjë rë Israel, nuhyun cjua naha. Canuhyuun cjua naha peru handasa cuatjin ne, cojo sa xi cuetju

ndaja ñihi naha ne, tsinchataha nuju jyê nuju. Sahme xi cuaha tsi xi cuma xitjê nuju hane suá nuju Hasen naha. Cuaxëndaja nga nandya Jerusalén hane cuma ngu nandya venguichji rë. Me xi matitjun xi hmí rë Ciro ne, ngu cha xi hisca hviin cha yo ngahan, peru sahmi cha cjuatacun naha cojo sa xi ndaja cuma nandya Jerusalén. Tsismi cha ngayun cojo sa xi cuma cuyun nangui nuju sehe nihñundujun yungun naha. Cuma xa vë jinguyějê rë xi vitexa cha. Hane xuta nangui Caldeo ne, cuma me castigu ngatsë rë cjuahngatacun xi casahmi me cojo nuju hane ngatsë rë xi jemu xta me."

Hane sacuaaha ngayun ne, vitsjen nuju tsëhë xi jemu cachjá cojo nuju xi cuma nuju castigu, hane quihndë camá vë. Peru castigu xi camá nuju ne, camá nuju cojo sa xi nuhyun hacuiin cojo sa xi tsicjê xuta tjê nuju. Sa xi canuhyun ne, casatiin nuju cjuañihi vë. Quihndë ne, cuangun cuatjun nangui Babilonia, hane cuyun nangui Judá, hane cuisécoo nuju. Peru xuta xi choho sahmi me ne, hatuxa choho hvë me, hane sahme xi cuma me castigu.

Cachja nga Nina cuitjin:

—Me xi hmí rē mosu ndaja naha ne, sahme xi jemu ndaja cuatju me hacuaha jemu ndaja scuëë xuta me. Jemu cjín xuta xi siu me jemu cjín nangui ne, cjuaharcun rē me ta scutsejen me xcusun xi tsajin yo chja xi cuma tsejen. Hacuuiin jemu ndajyihi me, yojo rē me ne, jemu cavatju cjuañihi hisca xi jemu yuma tsejen. Hane xuta ne, tsingatju rē me hacuaha sahmichuva rē me.

Cuatjin nihña ngayaan, hane nihña handasa xi cjuañihi xi cuatju me ne, cuatju me ngatsë rē jyê naja ta castigu naja xi tivatju me cahndë xi cuma yaan castigu. Hane ngatsë rē xi cuatjin casacu hmu rē me ne, tsinchataha Nina jyê naja. Sacuaha chu tsánga xi cavangaxin tsëhë hnchua má yaan, peru Nina casahmi me xi me vëhë satë rē me castigu naja. Sacuaha ficojo xuta ngu chu tsánga xi tsiquehen me chu ne, cuatjin cjuecojo xuta me; hacuaha sacuaha jindayaain ngu tsánga hora xi secun chu xcun me xi cuejnu rē chu ne, cuatjin tsajin camahani mé xi cuichja me hora xi secun me xcun me xi cjuahataha rē me hane quiji me cojo me. Tsajin yo xi cuichja tsëhë quihndi rē me ta, casacuiin rē me ta cjuahñu xi casacu rē me nguehe ngasunhndë ne, quijicanii rē. Peru sehe cumatsejen xi ndaja cavatju yëjë ni ta cavetjucaa jain cjuatacun rē me. Sahme jyê sahme

hnga me ta casua me cjuahñu rē me, hane cachja xuta tsēhē me xi ngu xuta tsehen me. Cuitjin casahmi me cojo sa xi cuma cuichjayumataha Nina ngatsē rē jyē rē xuta.

Hacuaha cuitjin catsihindu Isafas:

—Cuitjin chja Nina: "Yo ngayun xi tjin xi machaja nuju ne, nduvun ta suá nuju. Jemu chja vatjun ngajñi xa nuju peru ndaja cuatjun sa xi nuhyun cjua naha. Tisahme chihin compromisu xi cuma cojo nuju xi cjuecani rē yějē nu yějē nixtin. Ngayun cuma nuju xuta xi jercu tsíhmucacun hacuaha satē nuju xi tuhuncuendun hacuaha cuicuyun xuta ngasunhndē tsēhē yějē xcusun tsahan."

Nina ne, tacuntsja naja vėhē xi meje rē xi caveni nihña sa cjuatsehen. Nindeyan cjuatacun naja hane tsinchataha me yaan. Cjuatacun rē Nina ne, hacjahi xi cuma rē cjuatacun rē xuta hacuaha hacjahi xcusun sahmi me, ta hitsē sa ndaja vėē me. Cjua xi chja Nina xi cumá ne, cuetjucaa jain.

'Chja Nina xi suva xi ndaja nihña. Chjahanjendan nixtin xi chjahajenda rē. Xutaxin xi macjain rē me Nina hane hmucacun me

ne, sacu rē me cjuandaja rē Nina. Tjin rē me cahndē xi cjue sua me chu yungun sacuaha cjuatjo rē Nina. Hacuaha ngajan cuma cuisehen xuta tsēhē yējē ni nangui xi sahmi me oración rē me.

Nina ne, jemu hnga me, jemu jyē me peru hacuiin xta me, hane cuisecoo me xuta xi hacuiin xta me.

'Chja Nina ta tjin xuta xi sahmi me xcusun sacuaha xi faharcun rē me peru choho sahmi me cojo xuta xi sahmi me xa rē me. Hacuiin cuatjin cumá. Hitsē sa ndaja ne, ndaja sahmi me cojo xuta hane sahmi me cjuandaja cojo xuta yuma.

Cuitjin chja nga me xi hmí rē mosu ndaja rē Nina: "Hasen rē Nina ne, jiya cahntsua xahasen naha, vēhē xi casuaxa ná Nina xi suá cumachaya rē xuta yuma cjuandajyihi rē me; catsingatju ná me xi suá cumachaya rē xuta xi hinchá ndavaya ta hatuxa cuma ndaya me. Suá cumachaya rē xuta xi cafehe nixtin xi jemu sahmi Nina cjuandaja cojo yējē xuta ngasunhdē. Hacuaha cuechu nixtin xi cuma castigu xuta xi sahmi me cjuatsehen. Xuta xi va má rē me ne, suá rē me cjuetacun hane cuma ndama rē me.

**Sehe catsihindu Isaías cuitjin:**

—Chja Nina xi jemu ndaja sahmi me cojo xuta xi sahmi me tu cun cachja me cojo me peru cueya xuta tsehen xi cjuaharcun me nina ndacha. Cuechu ngu nixtin nduju hane jinguyějě ră ne, cuma cjuajeya ngasunhdě. Hya ne, sa chu nañasajyě o sa chu tsánga ne, cuma sině tangun chu hane hacuiin cjan ru.

**Ciro ne, casua me cahndě xi xuta tjě ră Judá ne,  
cavuya me nangui Judá  
(2 Crónicas 36:20-23; Esdras 1-2)**

Xuta tjě ră Israel xi cafahaxin sindadu tsěhě Nabucodonosor, me xi matitjun ră xuta caldeo tsěhě nangui Judá ne, caviyujucahndě me ngajan nangui Babilonia ngu jyanchan tē nu. Hane ngajan camá me mosu hndixahan ră xuta nangui vė. Tsěhě xi cuatjin caviyujuxin me tsěhě nangui ră me ne, nangui ră me ne, casacu cahndě xi cafahajenda ră, hane camá xatsě nga sacuaha cachja Nina xi meje ră xi cuma. Hacuaha cuatjin cama chihin cjua xi cachja profeta Jeremías xi cuma cuatjun.

Hya xi cajnetaha jyanchan nu jan ne, quihndë hacuiin xuta caldeo xi casahmi me gobiernu ta cavisehen xuta persa cojo xuta medo, hane catsijo tjë xuta vë casahmi me gobiernu, hane Ciro camá me xi matitjun. Nu tjun xi cavisehen Ciro xa vëhë ne, cama yuma rë me xuta nangui Israel hane catsihindu me ngu ley xi cuitjin chja:



“Nina xi Nina cjuaquixi ne, casua me ngahan cahndë xi cuitexa yëjë xuta ngasunhdë hane casuaxa me ngahan xi sahme yungun rë me ngajan Jerusalén. Quihndë cojo sa xi cuma cjua vëhë ne, suá cahndë xi tu yo ni me xi cuitéxa xi hacuaha xuta tjë rë Israel má me ne, cuya me nangui rë me xi sahmi me xa vë.

Hacuaha tsejen xi cuma meje rë cjuanchina xi cjuecojo me cojo sa xi ndaja cuma. Vëhë xi yahnga xuta xi siu ndee rë me ne, meje rë xi sua rë me quicha cojo tsjian cojo chu xi cuma meje rë me xi cjue me cojo cojo sa xi ndaja cuma vë hane cuma sua me chu sacuaha cjuatjo rë Nina.” Cuatjin cachja cjua rë ley jan.



Hya xi camá ne, yějě xuta tjun rě xuta tjě rě Judá cojo xuta tjě rě Benjamín cojo xuta nahmi cojo xuta levita ne, cachja me xi tjin rě me cjuasua xi cjue me. Hane xuta xi siu ndee rě me ne, jercu cjín cjuatjo casua me xi cuma rě yungun. Hacuaha Ciro, me xi matitjun jan, cavaxě me yějě xcusun quicha rě yungun rě Nina xi quijicojo sindadu hya xi cavetsun yungun jan. Hane quicha jan ne, cafahatsja Zorobabel, me xi matitjun rě xuta tjě rě Judá hane quijicojo me

nangui Israel. Xuta xi cavuya me nangui Israel ne, yachan jo mil má me. Tjin yo me xi caviyujucahndě me nandya Jerusalén, hane yahnga me cavuya me nangui rě xutachanga rě me.







